

ԿՈՏԱՅՔԻ ԹԵՄՈՒՄ

ՎԵՐԱԲԱՑՎԵՑ ԿՈՏԱՅՔԻ ՄԱՐԶԻ ԵՂՎԱՐԴԻ Ս. ԱՍՏՎԱԾԱԾԻՆ ԵԿԵՂԵՑԻՆ

Հոկտեմբերի 4-ին վերանորոգումից հետո, ձեռամբ Կոտայքի թեմի Առաջնորդ Ս. Առաքել եպիսկոպոս Քարամյանի, մեծ հանդիսությամբ վերաբացվեց Եղվարդ քաղաքի Ս. Աստվածածին եկեղեցին:

Հանդիսությունը սկսվեց «Հայր-Մեր»-ով, որից հետո Կոտայքի թեմի առաջնորդ Առաքել եպիսկոպոս Քարամյանը իր օրհնությունը բերեց վերաբացվող եկեղեցուն, Եղվարդ քաղաքի բնակիչներին, ինչպես նաև եկեղեցու վերանորոգման աշխատանքների մասնակիցներին:

Գերաշնորհ Սրբազան Հայրը իր գոհունակությունն ու գնահատանքը հայտնեց եկեղեցու բարերար Գեղամ Միքայելյանին, քաղաքապետ Նորիկ Սարգսյանին, ՀՀ Բնապահպանության նախարար Արամ Հարությունյանին՝ եկեղեցու վերանորոգման աշխատանքներին աջակցելու համար:

Հանդիսությանը մասնակցում էին թեմի հոգևոր սպասավորներ և մարզային ու քաղաքային իշխանությունների ներկայացուցիչներ:

Այդ օրը եղվարդցիների համար տոնական էր, և տեղի մշակույթի բաժնի կողմից կազմակերպված երգն ու պարը շարունակվեց մինչև երեկո:

ՆՈՐ ԳՅՈՒՂԻ Ս. ՀՈՎՀԱՆՆԵՍ ԵԿԵՂԵՑՈՒ ՀԻՄՆԱՔԱՐԵՐԻ ՕԾՈՒՄԸ

Հոկտեմբերի 11-ին, ձեռամբ Կոտայքի թեմի առաջնորդ Ս. Առաքել եպիսկոպոս Քարամյանի, կատարվեց Կոտայքի մարզի Նոր Գյուղի Ս. Հովհաննես նորակառույց եկեղեցու հիմնաքարերի օծման արարողությունը, որին մասնակցում էին մարզային և քաղաքային իշխանությունների ներկայացուցիչները:

Արարողության ավարտին Առաքել Սրբազանն իր օրհնությունն ու գնահատանքը փոխանցեց Նոր Գյուղի բնակիչներին՝ վստահություն հայտնելով, որ կառուցվող եկեղեցին օրհնություն պիտի լինի գյուղի բնակիչների համար: Սրբազան Հայրը նաև իր գնահատանքը հայտնեց եկեղեցու բարերարին՝ գյուղապետ Ռուբիկ Գևորգյանին:

Նորակառույց եկեղեցու հիմնաքարերի օծումից հետո տեղի ունեցավ մատաղօրհների արարողություն և զեղարվեստական միջոցառում, որ կազմակերպել էր գյուղապետարանը:

ԿՈՏԱՅՔԻ ԹԵՄԻ ԼՐԱՏՎԱԿԱՆ ԲԱԺԻՆ